

“ESTEBAN MURUETAGOIENA” TORTURAREN KONTRAKO HERRITARREN FOROAREN KONKLUSIOAK

Azkeneko 50 urteetan, Euskal Herriko 10.000 herritarrek salatu dute inkomunikazioaldian torturak edo tratu txarrak jasan izana. 2011ko azken hiru hilabeteotan bakarrik, 11 salaketa jarri dira, haietako batzuk bortxaketa eta sexu laidook. Nafarroan 17 lagunek salatu dituzte torturak azkeneko sei hilabeteetan.

2002. urteaz geroztik, 553 izan dira Euskal Herrian. Eta, denbora berean, 6.235 Espainia osoan. Datu hauek garbi adierazten dute praktika hori sistematikoa dela Estatu osoan, nahiz eta gure herrian zenbakiak egoera larriagoaren erakusgarri izan: hemen mila pertsonatik hiruk ezagutu dute noizbait infernu hori.

Tortura oraindik existitzearen arrazoi nagusia gaur eguneko atxilotetako inkomunikazio sistema da, nazioarteko erakunde guztiek kritikatu. Isiltasunaren aldeko itun bat da, legerian bertan hasten dena, baina beste maila askotan ere eusten zaio: politikariek agindu egiten dute, poliziek obeditzen, eta auzitegi-medikuek eta ofizioako abokatuak legezkotasun-presuntzioa onartzen diote iluntasun erabateko horri, epaileek inkomunikazioa agintzen dute eta handik bost egunera ez entzunarena egiten dute tortura-salaketen aurrean, komunikabideak isildu egiten dira, edo inkomunikazioa justifikatzen dute, jende askok du horren berri edo babesten du...

Torturaren eragina izugarria da gure herrian. Torturatuengan, jakina, baina baita hurbileko ingurunean ere. Arestian aipatutako zifrak izanik, herri honetan bizi garen gehienok bizi izan dugu hurbiletik, ezagutzen dugu hori jasan duen norbait, badakigu existitzen dela, eta badugu haren eraginen berri: berriz gertatzeko beldurra, eta edozeini gerta dakiokelako beldur kolektiboa. Zeren, torturak, eta haren inguruko inpunitateak, horixe bilatzen baitu: gizartean beldurra hedatzea, pertsonak geldiaraztea, beldurra jaun eta jabe izatea.

Hala ere, infernua gainditu egiten da gehienetan, eta Euskal Herria urratsak egiten ari da bortizkeriaren modu krudel hori behin betikoz desagertu dadin. Arrazoi politikoengatik atxilotutakoak inkomunikazioan izateari dagokionez, Espainiak agerian ditu lotsariak, eta gure herrian goratuz doa aldarri bat, berandu baino lehen inpunitateari bukaera emanen diona.

Gizartearen mobilizazioari eta denen konpromisoari esker, inkomunikazio erregimena indargabetzea lortu behar dugu, Torturaren Aurkako Taldeak torturari aurrea hartzeko emandako gomendioak aplikatzea lortuko dugu. Hori da helburua eta irabaziko dugun borroka. Tik-tak hasi da historiaren erlojua, eta toki gorena izanen dute hiru kontzeptu hauek: errekonozimendua, kalte-ordaina eta berriz ez gertatzeko konpromisoa.